

Edizioni

- letto 417 volte

Petersen Dyggve

I.

Li consirrers de mon païs
si longuement me trait a mort,
qu'en estranges terres languis,
las, sanz deduit et sanz confort,
et si dout mout mes anemis
qui de moi mesdient a tort,
maiz tant sent mon cuer vrai et fort
que, se Dieu plaist, ne m'en iert pis.

II.

Ma douce dame, ne creez
touz ceus qui de moi mesdiront.
Quant vous veoir ne me poez
de vos biauz iex qui soupris m'ont,
de vostre franc cuer me veez.
Maiz ne sai s'il vous en semont,
quar tant ne dout rienz en cest mont
con ce que vous ne m'oubliez.

III.

Par cuer legier de feme avient
que li amant doutent souvent,
maiz ma loiautez me soustient,
donc fusse je mors autrement!
Et sachiez de fine Amour vient
qu'il se doutent si durement,
quar nus n'aime seürement,
et false est amours qui ne crient.

IV.

Mes cuers m'a guari et destruit,
maiz de ce va bien qu'a li pens,
et ce que je perdre la quit
me fait doubler mes pensemens.
Ensi me vient soulaz et fuit,

et nonpourquant, selonc mon sens,
penser a ma dame touz tens
tieg je, ce sachiez, a deduit.

V.

Chanson, a ma dame t'envoi
ançoiz que nus en ait chanté,
et si li dites de par moi,
guardez que ne li soit celé:
? Se trecherie n'a en foi
et trahison en loiauté,
donc avrai bien ce qu'avoir doi,
quar de loial cuer ai amé. ?

- letto 323 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropaea.let.uniroma1.it/?q=laboratorio/edizioni-286>